

四庫全書

集部

欽定四庫全書

北海集卷二十五

宋 綦崇禮 撰

表

代呂頤浩辭免尚書右僕射表

對清光於行殿重瞻天日之容敷大號於路朝遽被鈞衡  
之選揣力小而任重覺恩深而報難敢露愚忱仰干天聽  
臣某中謝竊以宰相之任天子是毗叢萬務之幾微職無  
不統極四方之遐遠民所具瞻惟時重輕繫人得失矧皇

家之多故當國步之載艱戎馬新逼於江淮狐鼠甫離於城社正倚賴廟堂之重以鎮安中外之情若無救於顛危馬用彼相盍委成於勞舊以靖國人如臣之愚惟上所察叅鴻樞而出使初無却敵之謀護諸將以來朝安有勤王之績謂方議罪更誤疇庸孰師孰表而進長於百僚何德何功而超登於一相忽膺朝命深悸危衷輒自列於君慈冀少寬於衆謗伏望皇帝陛下神心獨斷睿鑒曲臨亮微臣非經濟之才難居大任體舊弼有保調之効可倚成功

勿輕事於改圖，俾獲辭於誤寵。庶易盈之量，進逃覆餗之辜。而非據之資，退免危身之咎。陳情良切，得請是期。

代呂順浩謝尚書右僕射表

帥師入覲，還超拱極之班。論相疇庸，據被揚廷之命。既循墻而有請，終反汗以無從。責與恩深，感隨懼集。臣某中謝伏念，臣識非致遠材，不踰中起齊魯之諸生。厯試劇繁之用，習唐虞之久。治晚羅剝亂之傷，嗟藉險之備嘗。慨功名之未就，誤蒙知獎。引寘近巖版部理材，無足國

裕民之術天官典選之揚清激濁之稱屬陪扈以時巡  
適參禋於軍務願屯江險以遏淮衝進陞秘殿之華擢  
預中樞之政顧外虞之未靖方事撫寧駭內禫之無名  
竊懷忠憤鼓鷹揚而朝下毆鼠竊以宵遁寶祚重新還  
正當陽之位皇慈過聽亟膺賚弼之求惟中原當難否  
之期念疆敵肆侵凌之計典章盡廢姦宄未銷熙庶績  
而弼一人宜更理紀綱之務撫四夷而安百姓在調和  
中外之情欲圖再造之功宜得非常之佐夫何庸妄乃

許叨塵此蓋伏遇皇帝陛下躬大禹之儉勤負成湯之  
勇智念二聖蒙塵之久蓋嘗膽而不忘軫三軍暴骨之  
傷寧責躬而自咎初還明辟益務遠圖敷求輔相之材  
俾濟艱難之業曷容哀懦輒與登庸臣敢不盡力百為  
矢心一節振皇綱之已墜扶國勢以不傾才謝魏侯粗  
識漢家之故事賢希山甫庶歌周室之中興

代呂頤浩為熒惑犯太微乞罷政表

理陰陽而遂萬物久慙曲逆之言因灾異以免三公宜

舉漢家之典輒陳危悃上黷宸慈臣某中謝伏念臣識  
昧遠圖器難大受身遭聖主有興衰撥亂之資任忝弼  
臣之厭難折衝之望皇綱未振國步猶躑敵騎侵陵乃  
長驅於江表鑿輿播越至遠泛于溟波盜賊猖狂而無  
鎮服之威生靈屠戮而寡撫循之術咎由失政謫見圓  
穹肆星犯於太微適位丁於上相事無虛作既占天戒  
之明變不空生其在臣躬之應儻尚饗於大寵必自速  
於深憂敢云退避以全身正恐顛隳而誤國夙宵內省

寢饋靡遑伏望皇帝陛下仰順天心俯稽民望念人材  
之有限察駕力之已疲四方是維既負秉鈞之責三辰  
不軌茲誠擢士之時更選真賢賜休暮景解機衡于廊  
廟庶銷乾象之災奉香火於祠宮永祝聖人之壽

代呂頤浩謝賜御書蘭亭表

臣某近赴行在奏事朝辭出門行至建康府東門十里  
伏蒙聖慈賜臣御書蘭亭一軸者絳闕清都甫違帝所  
雲章奎畫忽到人間被寵錫之非常覺衰殘之有耀臣



其中謝竊以隸文變古書法爭新魏氏已還東晉擅搖毫之妙鍾繇而降右軍馳獨步之名矧蘭亭修禊之游非金谷望塵之侶騁懷寄傲存逸想于胷中感事臨文發竒資于筆下斯極當年之美遂成歷世之師珍藏既出于雲門傳刻僅留于朔塞疲精莫近絕軌誰攀恭惟皇帝陛下好學性成多能天縱稍屬干戈之暇不遺翰墨之娛心慕手追何勞取法龍盤鳳翥直與抗行實為今古之無雙豈止帝王之第一臣少勤筆硯晚際風

雲憂常在於邦家老已捐於文字誤膺上賜還愧夙心  
懷寶言歸未免登牀之誚據鞍自失但驚照乘之光期  
傳秘於私門庶輸忠於永世

代李邴辭免尚書左丞表

參右府樞機之任政恐懼以循牆備中臺管轄之司載  
褒揚而出綽顧辭尊而益進驚避寵以加榮更瀝愚誠  
重紆天聽臣其中謝伏念臣器難大受學謝多聞委質  
效官徒守詩書之素業逢時得路幸聯翰墨之清資頃

流落以還朝屬倉黃而扈蹕戡奉天之難之陸贄居中  
之籌寢淮南之謀慙及黜在朝之望不虞孽將輒肆姦  
圖竊懷憤懣之誠力折兇邪之計惟節義之閑敢廢僅  
効小忠顧靈長之祚重新方恢大業曾謂新樗之質乃  
堪棟宇之求雖親詔丁寧誠聖君之深眷而危躬踧踖  
知高位之疾顛祈反汗以無從敢叩闈而有請伏望皇  
帝陛下廣堯舜知人之鑒稽宣王復古之規咨四岳  
以旁搜俾熙庶績任真賢而共治用佐中興簡黜罷庸

退居冗散則得人之効庶克濟於艱難而非據之危亦  
或逃於顛覆陳詞已確得請為期

代李邴謝尚書左丞表

備言語侍從之流或能陳力參輔弼疑丞之後豈所當  
仁循墻莫奉于俞音造膝載煩于溫諭凌兢拜命慚汗  
在顏臣其中謝伏念臣術昧經綸才非康濟被道皇之  
眷遇顛由文藝而進陞蒙聖主之記憐復采畸孤而收  
名每思竒節少報大恩屬陪扈以南巡遇倉黃而內禪

折衝禦侮曾無却敵之謀正色立朝固有疾邪之志阻  
堯燭於方熾扶聖日而再中時惟將相之叶誠允副神  
人之共願顧司敗之刑不及已荷寬仁而左網之任旁  
求乃先庸妄服寵章之優異出親詔以褒揚名愧舊儒  
輒踐久虛之位勲慚上相亦叨連茹之優此蓋伏遇皇  
帝陛下乃聖乃神克勤克儉念皇家之多故圖大政以  
更新成祀夏配天之功期復少康之舊業推任賢使能  
之効將隆周室之中興俯收一介之長伴預四隣之列

憂深責重恩厚命隆臣謹當奮勵猷為激昂哀懦同心  
濟務敢忘可否之和一節事君願盡糜捐之報

代李邴謝賜生日羊酒米麵表

弧矢在門還遇始生之日饗醪備物首膺妍好之儀仰  
對寵休俯增愧惕臣某中謝伏念臣忠雖許國仕本為  
親永言誕育之勤實負劬勞之德乃煩上賜徒作身榮  
矧寵命未安方循墻而請避顧多儀遽及當拜貺以知  
慚此蓋伏遇皇帝陛下禮以使臣物其將意屬閭胥之

紀旦斥臺餽以疏恩厚矣不貲缺然奚稱粗知學古敢  
貽饋啜之羞苟可報君願効糜捐之節

代王復謝成都利州路幹轄界首交割表

竊郡寄於一麾方假汝陰之守付兵權于兩路俄為劍  
外之行甫屆部封遂交符印布朝廷之威信溢衢巷以  
歡呼臣某中謝伏念臣智不逮中才非經遠繇力薄才  
之用徒守近功盤根錯節之煩每當劇任頃玷使華之  
選荐分漕計之憂屬瀚寇之猖狂會王師而掃蕩飛芻

挽粟日常調於千金斬馘執俘月透聞于三捷仰憑廟  
勝無乏軍興敢辭心力之俱殫深懼譴訶之莫追荷上  
聖哀憐之渥輟近藩偃息之優歲月未移寵靈繼被載  
陞禁職往撫蜀師臨遣於朝恭體至仁之恤遠奔馳就  
道豈遑小己之圖安方入境之云初識捐軀之有所此  
盖伏遇皇帝陛下天臨九有日照萬方眷西南近邑之  
遙尤慎總戎之寄顧小大臣隣之列宜多濟務之才曾  
是凡庸乃堪委屬臣敢不講明軍政綏撫邊民務安遐



俗之情共樂太平之治丘山恩重不知蜀道之難葵藿  
傾心但覺堯都之遠

代王復謝除徽猷閣直學士表

剖符出守已蒙從欲之私鳴玉通班更誤隆儒之選懷  
美名之甚寵撫弱質以增羞臣某中謝竊以崇寶樹于  
西清奉列聖圖書之府敞直廬于中禁延一時詞學之  
臣禮優踰麗正之規地近亞金鑿之秩備內朝之顧問  
任常屬于通儒作外服之光華賞或加于顯績倘功能

之未白豈授受之攸宜如臣者屬托宗盟譽慙時輩竊  
守布韋之志妄希竹素之名經術起家未究向歆之學  
文章傳世曾無白賀之才遭遇千齡記憐一槩與甘泉  
之持橐進為同姓之先典藏室之讐書躡屐羣英之右  
已過易盈之器深虞可畏之言列愚懇以扣閣軫宸心  
而出綈舁一麾於近郡既獲便安第五閣之清資復叨  
遷次顧事勞之未著何褒典之直加然引分投誠自甘  
遐外而䟽恩錫命乃極優榮此蓋伏遇皇帝陛下大德

曲成至明旁燭察庶工於采采敦九族以親親寒士同  
升庸示天枝之勸英躔並驚俾參禁路之游肆得請以  
承流猶寵行而進職君親恩重螻蟻命輕願圖報政之  
方庶息罔功之謂身遥魏闕難安江海之心名在丹臺  
終反塵埃之跡

代鄭望之謝除戶部侍郎表

備臺中之郎屬姑試冗曹庀左戶之貳卿遽陞要任飭  
兼衣而出笥束寶帶以華身拜命非常撫躬罔措臣某

中謝竊以冢宰制國用而出納歸有司之責司徒掌邦  
賦而度支專左曹之繁故在平時最稱劇部矧此多虞  
之際豈惟經費之艱由邊防失禦狄之機肆京甸萃勤  
王之旅餌戎車之衆金繒殆竭于羸餘給貔虎之師芻  
粟方勞于飛輓必有裕民之長策乃為足食之良圖如  
臣者風力不彊材資甚下教忠有訓期黽勉以承家見  
義當為敢逡巡而避事駭戰塵之侵軼逼都邑以震驚  
和議初陳敵情巨測寇至君誰與守彼忍偷安兵交使

在其間臣奚恤死賴真人之嗣極致大敵之草心惟肆  
貪求卒歸成好繫聖神之所格在臣子以何功宜即嚴  
誅顧叨異寵歛自散郎之列徑躋法從之聯雖世服厥  
官獲繼先臣之舊而朝容幸位懼塵初政之明憂深徒  
切於循墻令出終難于反汗夫何孤遠乃爾遭逢此蓋  
伏遇皇帝陛下躬大禹之儉勤負成湯之勇智無為而  
用天下自銷偷侈之風不戰而屈人兵陰奪寇攘之計  
屬此纂圖之始邁茲猗夏之虞德務好生嘉與兆民之

康樂仁寧屈已姑從一切之權宜欲就遠圖豈難小忍  
共識人君之度曾何使命之勞猶錄妄庸遽令超躡而  
臣比緣計議數對威光仰英斷之無前知睿謀之有在  
側身嘗膽願無忘今日之憂報國捐軀顧敢愛他時之  
力

--	--	--	--	--	--	--	--	--

欽定四庫全書

北海集卷二十六

宋 綦崇禮 撰

表

代范宗尹辭免叅知政事表

引當言路方愧空餐進貳政機遽容充任今出雖難於  
反汗憂深猶切於循牆敢露愚衷仰干聰聽臣某中謝  
伏念臣奮由一介被遇三朝得於射策之初識其無隱  
擢在可言之地許以不欺歷長諫垣驟持從橐屬乾坤



之震蕩僅免誅夷眇江海以流離未知報効豈謂大明  
之照亮茲小己之誠綸掖代言方從收召霜臺執法俄  
俾超踰力難振於頽綱言莫裨于聖智忽驚嚴命延寘  
近司顧難難險阻之中孰當大任豈輔弼疑丞之選可  
用非才時危敢計于愛身器小實虞于誤國周章自省  
顛倒失容伏望皇帝陛下曲軫皇慈俯回睿鑒改圖賢  
德冀多難之可安罷退妄庸庶煩言之克弭陳詞良確  
得請是期

代賈公正謝淮東提舉茶鹽到任表

參佐罔功未上大農之最光華設寵遽叨膚使之榮莅  
事云初撫躬知愧臣其中謝伏念臣才非特立恩自賞  
延挾冊讀書莫繼箕裘之緒抗塵走俗備嘗州縣之勞  
綆短固難於汲深器小奚堪於受大偶逃曠敗寢與使  
令出貳便藩頗識詔條之意入丞劇寺粗知調度之宜  
方睿聖之中興屬邦家之多難維富國強兵之術蓋時  
務之所先顧摘山煮海之饒實利源之攸出豈意選掄

之際乃容罷懦之資驛騎徐驅並長淮而無阻駕班同  
進奉清蹕以非遙自省遭逢抑何徼倖此蓋伏遇皇帝  
陛下天資勇智躬履儉勤因巡省以治兵將見周宣之  
復古慎疇咨而遣使上追堯帝之知人眷茲近部之優  
庸試小臣之用遇加識擢俾勸事功敢不仰體焦勞俯  
鞭駕蹇察吏能之勤惰期歲入之豐餘宵旰分憂懼難  
勝於絲薄米鹽陳力期少補於隆平

代林積謝知平陽軍到任表

皇華將命已甘失職之誅皂蓋領條更誤承流之寄始交  
符印祇見吏民布上德之寬矜合衆情之鼓舞臣其中謝  
伏念臣生由遐遠出遘昌明挾冊讀書徒守古人之糟粕  
抗塵走俗莫追當世之英豪分沉州縣之勞望絕功名之  
會間承人乏偶玷主知付一道之澄清荐更使指預九重  
之臨遣再對天光念遭遇之良難思激昂而自効弗究馳  
驅之力遽從簡汰之科敢謂記憐猶加選用甫上使臣之  
節還紆太守之章惟先朝晉邸之舊藩實上世唐堯之故

國民淳俗樸尚存勤儉之風地廣物饒猶賴撫循之政頃  
隸按臨之部尚求利病之原既頗悉於人情庶靡勞於吏  
治夫何僥倖乃獲便安此蓋伏遇皇帝陛下智日普臨仁  
天廣覆酌變通而新庶政明廢置以馭羣臣謂奉使無功  
盍擇材而更理顧字民有素俾守土以觀能特假名城用  
圖報效丘山恩重螻蟻命輕臣謹當冰蘖持心駑駘竭力  
遠慕循良之蹟仰寬仁聖之憂課十縣之繁敢憚米鹽之  
細上三年之窳冀收毫髮之多

代鄭鼓謝除御史中丞表

備七人之上列久尸諫省之員總三院之大綱伏忝憲  
臺之長超踰已甚憂責彌深避寵命以無從撫危躬而  
增懼臣某中謝伏念臣器難受大才不及中由管庫之  
卑微預朝廷之任使濫當言責屬此難虞奉白簡以抨  
彈徒有怨仇之積伏青蒲而規勸愧無獻替之稱罪已  
著于丘山功靡陳于毫髮宜從譴斥更誤褒升方今國  
步未夷皇家多故敵王所愾外雖倚于爪牙誥國之姦

內實資於耳目必得力能厭難名可折衝不吐剛而茹  
柔俾繩愆而糾謬庶張國法先振主威曾何妄庸乃堪  
掄選此蓋伏遇皇帝陛下紹登大寶光御丕圖乃聖乃  
神固有生知之性克岐克嶷共瞻天縱之姿奉慈訓於  
東朝布英才於言路過收舊物使率乃僚臣敢不祇服  
訓辭激昂懦守見無禮者必擊期少舉於頽綱知有命  
而不回誓益堅於晚節

代鄭鼓謝依同知樞密院恩表數

位列中樞既被非常之遇寵均近輔更叨越次之恩荷  
德不貲撫躬罔措中謝伏念臣器微有限量狹易充參  
法從之華竊榮名于祕殿贊本兵之寄預密議于籌帷  
雖任階廊廟之崇顧班在疑丞之後惟器名之不假視  
資望以猶輕國有異章禮存異數於臣侈矣敢妄意於  
殊私何錫予之是齊肩於同列此蓋伏遇皇帝陛下受  
天申命圖國中興眷茲政事之聯同任艱難之責用均  
上賜俾一乃心小才不離小官已愧超陞之異大言則



望大利敢忘報稱之難

代李邦彥謝先少師賜謚宣簡表

恩賁寶符載舉追榮之典寵紆華袞特頒忠節之褒霑  
厚澤于九原藹遺芳于千載嫠孤感涕松檟生輝臣某  
中謝若昔聖謨且循周道謂叙勲而累行必考謚以尊  
名為惠若康斷一言而可定合文與獻應二法以無嫌  
慰孝子慈孫之心作忠臣義士之勸欲有聞于永世宜  
不愧于平時伏念先臣某生忝聖民學知儒業逢清時

之宴樂保白首之康寧蓄德不施莫展濟時之畧教忠  
弗倦僅收訓子之功持從橐於甘泉稱善人于鄉里上  
方貴齒天不假齡陪冊府之英游玉輦曾回于舜目冠  
河圖之禁職蜜章深惻于堯言荐因愚息之恩進守孤  
卿之號殊私未憖異數繼頒爰稽追勸之文庸致寵嘉  
之意小言望小利視功名已謝于前生大行遇大名顧  
道德乃彰于身後弗自有司之義俾為人子之光存沒  
與榮戚疏均嘆此盖伏遇皇帝陛下篤忠信而恤老秉

明哲以知人禮務始終軫至仁于疇昔言為褒貶著大法于將來念耆龐宿齒之臣有浚達直行之節過形聖訓兼錫美稱述士誅而有傳書史篇而不朽臣銜哀未既拜賜增悲志在顯親已極揚名之義身當許國但堅移孝之誠

代李邦彥謝起復表

倚廬梓里方深何怙之懷出綈楓宸遽復頻虛之促以僅存之殘息而使之陪國論以已試之空官而責其贊

治功懇避無從兢惶罔措臣伏念奮身踈迹逢時休明  
親膺睿聖特達之知服在左右疇咨之列俯殫末技顧  
玩歲愒日以無聞仰跂清光惟奉令承教之不暇知力  
微而勝重果福過以災生雖保全允賴於皇慈而禍釁  
難逃於天罰未究循陔之養忽纏陟蛄之悲曲軫宸心  
特優恤典冠隆名於五閣肆推審印之褒庀襄事於九  
原仍厚輜車之委松楸改色閭里生輝不忘孤苦之身  
每示記存之意奪情以起捐日以需甫終哭踊之期申

命維綱之舊哀情累上天聽莫回夫何待盡之微生乃  
冒非常之異數洒寶章而關天運載紆紫詔之溫頌駟  
騎以冀星馳荐枉皇華之重扶力前趨於嚴召疏恩亟  
對於便朝玉色賜憐德音甚渥諭以顯親之大勉其許  
國之方履地戴天奚勝跼蹐摩頂至踵盡出生成矧茲  
筦轄之司實佐鈞衡之任念齷齪備員之久已愧罔功  
豈皇皇銜恤之中敢云善職茲荷龍光之渥更慚鼠技  
之窮此盖伏遇皇帝陛下禮以使臣道無棄物深顧邦

家之計聿嚴輔翼之圖矧制服以情當致三年之愛然  
斷恩以義寧逃二事之嫌爰俾從權靡容退處寵靈橫  
被感涕交流臣敢不恭體殊私益堅素守收思慮於摧  
裂荒迷之後勞筋骸於憂傷毀瘠之餘貪祿何心忍死  
但從於王事教忠在耳捐生期報於君恩

代謝江東轉運使表

襍被去曹罷列郎官之宿褰帷行部復馳使者之星董  
長江漕運之權付十郡澄清之寄恩隨責重感與懼并

臣某中謝伏念臣生本寒鄉世皆儒業學三冬而射策  
嘗妄意於英游展四體以效官但徒勞於吏役時哉易  
失老矣何為頃叨薦鶚之聞驟玷握蘭之選屬衣冠而  
南渡偕父子以同奔脫此一身瀕于萬死顧險阻艱難  
之備歷僅保殘年且憂傷衰病之交攻可當劇務幸聞  
汰免謂獲退閑敢言簡記之私更被光華之遣矧六飛  
駐蹕不忘北顧之圖而列戍臨江方謹南侵之備師屯  
甫集饋餉實繁宜資心計之能無乏軍須之給乃容哀

憊尚預使令此蓋伏遇皇帝陛下明哲生知聖神天縱周  
王復古挺興衰撥亂之姿唐帝知人廣因能任官之道初  
營江表首命使臣博訪庶僚俯收一介謂煮海採山之政  
嘗所按臨彼飛芻挽粟之方宜知利病肆加誤寵將責成  
功臣敢不澡淪初心激昂晚遇愛人節用仰推上聖克勤  
儉之風祝國裕民願講前賢知取予之術

代宰執賀順州進柁祀表

靈根夜吠變異質於千年驛騎朝馳薦聖人之萬壽眷荒



裔沉藏之久實王師恢復之初物豈無知時如有待臣某  
中賀臣聞神仙不可以學得至道不可以情求訪雲海之  
三山殆為虛語候金丹之九轉安覩成功與其捕影以待  
勞孰若清心而自至惟養生之上藥著却老之嘉名夙標  
農帝之書雜見道家之記驗西河之遺法蓋推服餌之良  
詢南丘之故封厥有延長之益能致飛仙之變化更傳伏  
狗之精英方士搜竒歎窮年而未遇邊臣効異得具體以  
來歸疑彼舐鼎之留形宛若結芻而取象天心垂佑上符

所屬之辰地寶儲休下見始開之境帝齡兆永國祚增  
隆恭惟皇帝陛下體妙希夷凝神昭曠四海覲亨嘉之  
會羣生躋仁壽之區域彼朔方允合天人之望震于瓊  
物是興草木之祥式彰闢國之符益衍後天之算遺一  
丸而生羽翼笑魏君誇誕之詞名百物而垂衣裳協帝  
祖神靈之德事光簡策懽動搢紳臣等佐治無功逢辰  
有幸數北州之貢既觀壽物之竒占南極之躔佇奏老  
人之瑞



欽定四庫全書

北海集卷二十七

宋 綦崇禮 撰

表

代宰執賀壽嶽生芝草雙竹表

靈華蔓蔓擢重英累葉之祥綠竹漪漪聳共本雙萌之  
異協此千齡之運見於萬壽之峯兆實有開懽均無外  
臣其中賀臣聞天地並貺乃興絕異之祥草木無知亦  
感太平之應賢愚同信圖謀可觀維寶嶽之蟠基奠宸

居而作鎮雄固實岱嵩之配穹崇疑霄漢之連神運天  
成宛峙蓬山之宮闕雲奔電掣屢瞻仙馭之龍鸞宜上  
帝之還資肆元精之回復併鍾瑰產用告珍祺圓蓋髣  
柯挺煌煌之三秀駢枝偶節殊冉冉以孤生美踰漢殿  
之九莖竒壓渭川之千畝蒼虬下降同呈菌蠢之姿萼  
綠相輝共對嬋娟之色自今創見訂古無倫恭惟皇帝  
陛下紹堯舜之純風承祖宗之休典登于至治粲六合  
以同文洽此太和擁萬靈而薦祉肆及無情之類共彰

有道之期五色可餐度年齡而有永四時並茂因苞本  
以無疆天意在茲物生共驗臣等親逢華旦目覩成功  
帝省其山既獲非常之瑞神降之福尚觀滋至之休

代宰執賀後苑太清樓前生芝草表

寶構崢嶸貯太空之和氣金芝菌蠢呈治世之嘉祥繫  
禁籞之儲休見靈華之薦祉臣其中賀臣聞庶民歸心  
則天瑞至植物蒙德而芝草生聖哲有傳賢愚可信甘  
泉歌美用昭元祀之誠函德書竒克著中興之效倬彼

自天之祐實為有道之符孰若聖時屢臻休應雜運遠  
來於方貢魁殊近出於皇居歲未一周祥今三見閣名  
宣道顯希夷妙物之功門揭敷春表生植如山之德偉  
太清之崇制承列聖之宏規別棲御府之名書間接巖  
廊之近輔前言徃行恣充一夜之觀忠臣嘉賓密奉需  
雲之燕惟致福召和之道職親賢稽古之由上帝博臨  
宮童効異金英並秀絢藻并以煌煌紫蒂駢分映奠階  
而蔓蔓傳觀衆目欣頌一詞恭惟皇帝陛下聖日普臨

仁天廣覆周行無外恩漸四裔之黔黎南向如歸風動五  
關之草木矧茲祕苑實近嚴宸天且應誠地何愛寶肆元  
精之回復茁神草之芬敷合彼圖書曾罔愆於象類薦之  
郊廟宜不愧於聲詩臣等數覲珎符莫窺妙用備諸福之  
物適觀四海之來臣申無疆之休永賴一人之有慶

代宰執賀良嶽敷春門生芝草表

真寶嶽於宮隅克壯九重之勢擢神芝於門闕式昭萬  
世之符慶祚邦家觀傳海宇臣其中賀臣聞天之降瑞



也常應誠而示報神之監德也或因物以薦休惟靈草  
之芬敷繫太和之克浹茁九莖於秘宇是興漢帝之歌  
采三秀於瓊山嘗感騷人之賦蓋必祈祥於聖括故能  
均信於賢愚倬彼良岑鎮茲京室靈秀實華嵩之配  
穹崇疑霄極之連神運天成宛若海山之宮闕雲奔電掣  
屢回仙馭之龍鸞嘉上帝之博臨偉宮童之効異鏡翠  
珉而炳炳欲章萬世不拔之洪基絢金色以煌煌肆有  
累葉相重之異本仰聖言之垂信知天意之同符妙用

難言嘉祥可見恭惟皇帝陛下運希夷之元化撫晏粲  
之昌期德合乾坤法黃帝垂衣之象仁加草木有周成  
行葦之風庶邦彛方嶽之朝四海望名山之幸震於瑞  
物兆比介丘異中黃藏府之傳掩函德銅池之美事光  
千古喜動一時臣夙偶熙辰薦逢休證披圖按牒益觀  
符應之明登岱躡梁願剡禮文之盛

代宰執賀尚書省生芝草表

出大政於中台克舉一王之法資洪休於上帝式占三

秀之祥感于至治之馨香表此太平之官府薦紳動色  
率土交歡臣某中賀竊以文昌萬化之原職無不統尚  
書百官之本人所具瞻時為端右之司實總機衡之務  
運開列考道冠前王大飭庶工肇新華省事得其序備  
存為政之經官惟其人曲盡任賢之道嗣興元聖丕闡  
大猷深思垂裕之勤尤慎持盈之念建公師而典領正  
宰揆以分釐不愆不忘悉舉舊章之善無偏無黨咸歸  
王道之平土宇闢而四夷兼被於威懷生齒蕃而兆姓

同歸於仁壽恩光浹洽和氣薰蒸是鍾芝菌之華特產  
機衡之地披圖按牒共知天意之明修德錫符益顯聖  
時之應恭惟皇帝陛下業隆寶祚道振皇綱善駕馭而  
任羣臣謹緝熙而經百度重規疊矩布治具于邦家端  
本澄源委化樞於臺閣凡道揆於一堂之上蓋法行於  
六職之聯偉茲靈草之生如告成功之効神休甚侈適  
依北極之真祠瑞物有傳永作南宮之故事臣等叨陪  
近輔獲望清光日月照而四時行孰測斡旋之妙神靈

應而嘉祥見共欣明盛之期

代宰執賀平契丹表

帝德廣臨始獲全燕之盛天戈薄伐遂平正寇之餘戮  
桀黠之渠魁撫傷殘之降衆神祇嘉悅疆場又寧臣某  
中賀臣聞受天命而臣萬方王者所以大手一統柔遠  
人而安諸夏天子所以守於四夷惟去來荒忽之難常  
故叛服恩威之迭用維時北狄實隔中華乘五季之不  
綱盜一方而自擅既合并於八部因噬服於諸蕃星躔

掩析木之津輿地闕幽州之貢賴累聖擴涵容之德越  
百年無討伐之虞屬寇運之告終致戎首之失守民心  
厭亂邊馬尚忘于北嘶物意歸仁塞草亦知夫南向蠹  
茲奚種思逆天常當衆軍效順之初獨懷旅拒洎故境  
復平之後猶緩大刑竊擁駝馬之羣偷安沙漠之地伺  
我邊隙奮厥狡謀天誘其衷輒空離於巢穴神降之罰  
敢侵軼於疆陸王師一麾敵衆再北舉太山而壓邠勢  
必自摧張螳臂以當車力何能禦執俘相係委伏爭奔

欽京觀以如山牧馬牛而蔽野顧人勞則下皆怨而勢  
定則內相圖肆首惡之伏辜掩兇徒而悉殄誅行夷落  
聲震龍荒闕塞閭閻永襲漢家之俗田園耕織共安幽  
土之風恭惟皇帝陛下道冒八紘威加九有旌旃所指  
先之以無敵之仁鈇鉞有征臨之以不殺之武偉此平  
燕之舉亶為復古之能餘孽載殲大勲是集克就祖宗  
之志用申廟社之休矧電隕羌營仰天心之助順而禾  
生燕土見神載之呈祥豈人力之能為殆神功之默運

捷音誕布歡頌攸同臣等獲與廟謀恭聞宸算運籌中  
幄慚無補於皇猷坐治明堂願永揚於聖化

代宰執賀熙州甘露表

至陰肅肅安厚載于坤輿零露凜凜格休符于天鑒誕  
降高真之宇適臨寧貺之辰懽動使車恩流邊鄙臣某  
中賀竊以滋液滲漉者雨露所以生物勞來還定者帝  
王所以安民必下得于人情乃上來于天瑞眷彼洮河  
之境雜居戎夏之羣烽燼不驚歲事樂三時之務銅機



偶觸宵衣勤丙夜之思臨遣使華徃綏遠俗布王言而  
人人挾纊宣上德而物物回春聲與氣和不言斯應澤  
隨恩浹莫令自均時維天地之同流孰睹陰陽之偏勢  
織芟巨植普沾飴醴之甘列障連城永奠金湯之固恭  
惟皇帝陛下體神叅化妙道成能坐明堂而正天綱定  
寶鼎而調元氣波橫六合化行寧限于西東中及萬靈  
德洽遂充于上下肆及邊陲之地載瞻行露之祥承仙  
掌于修莖竊陋漢京之賦霏蓼蕭于四海式追周雅之

歌臣等早遘明昌薦觀懿燦天不愛其道允臻膏澤之  
豐年地得一以寧實賴財成之妙用

代宰執賀燕山甘露表

車書混同浸恩波于遠俗天地相合灑瑞露于新疆俯  
元命之前期委上真之秘宇帝心昭著聖歷綿長臣某  
中賀臣聞和氣所以致祥仁聲所以柔遠陽勝者則散  
而為雨露蓋上天化育之功陰衰者其應在于蠻夷實  
中國安疆之證眷彼全燕之地久淪亡寇之區運極數

終罪盈惡稔棄遺氓而莫撫戴元后以知歸威武張皇  
大慰雲霓之望惠慈滲漉盡離塗炭之辜霈膏澤于立  
苗將槁之餘濯清涼于執熱如焚之際人漸厚德天錫  
珍符肆卜瑞于殊庭用薦休于景祚珠凝玉蘂異霄降  
之金莖脂潤飴甘疑朝和于瓊液繫一人之有慶協六  
合以同風大美何言嘉祥可驗恭惟皇帝陛下道兼覆  
載德徧羣黎揚九廟之明靈追繼丕承之烈復五闕之  
要塞坐收不戰之功民懷有仁天不愛道洽彼湛恩之

施格茲膏露之祥邊徼永寧邁零庭之著異神祇並貺  
陋託號之誇竒臣等獲構昌時荐逢盛事太和充塞已  
觀天下之一家休應彰明更祝聖人之萬壽

代前任宰執謝賜臘藥口脂表

息老收民與閭里蜡賓之樂膏唇衛體分宮闈臘劑之  
珍錫予惟新矜憐如舊臣其中謝伏念臣功慚謀國恩  
許歸田歲喜順成同賴農夫之慶時加好賜猶叨公輔  
之儀戴厚德以不貲體殊私之未慙此蓋伏遇皇帝陞

下仁均踈近恩厚始終仙粒儲靈知免負薪之疾玉肪  
借潤更滋槁木之容屬當謝事之初莫効捐軀之素

代宰執賀八月一日霽雲不見日蝕表

太史獻占日在當虧之候聖人修德天垂純祐之符有  
來雲物之祥莫睹陽精之闕臣某中賀竊以天神相遠  
匪聲臭之能求歷象有明乃躔離之可考維盈縮或違  
其常度則推占因著於繁文雖日有食之何繫灾祥之  
事而分同道也初非次舍之差赫彼衆陽之宗炳為羣

目之用拂扶桑而出暘谷豈陰慝之能干坐明堂而正  
天綱知聖功之默運交居朔日時當仲秋仰大明之方  
升藹微露之徐覆霞舒霧集詎觀如月之初氣霽煙銷  
還照普天之下事先載籍喜溢寰區恭惟皇帝陛下道  
並堯明功高湯聖在璿璣而齊七政調玉燭而行四時  
德上昭天允格太和之應日不食朔是謂太平之期實  
茲難致之休若有固然之理神心不測妙用孰窺臣等  
叨備近司獲逢盛旦修六官之治顧敢怠於欽承揚五

色之輝尚繼瞻於慶瑞

代百官賀冬至表


一氣回旋消長驗陰陽之理七日來復高卑見天地之心方寶曆之迎長宜法宮之儲祉臣某中賀恭惟皇帝陛下神參化育道妙裁成四時調玉燭之和七政順璇璣之運清臺觀象協珠星璧月之躔緹室候祥兆竹管葭灰之應仰乾剛之獨斷乘陽德以方隆與時偕行茂對履長之慶終古不忒紹膺滋至之休臣等生遇昌辰

慶逢令節得天之紀永觀神策之增新如日之升願賦  
周詩之歸報

笏記

冬無愆陽共慶同雲之瑞宴有折俎俄霑湛露之恩恭  
惟皇帝陛下治通神明誠贊化育喜格屢豐之兆式知  
飫賜之歡論道經邦顧何裨於變理醉酒飽德期勉輔  
於隆平





欽定四庫全書

集部  
北海集卷  
二十六至  
三十三

詳校官右中允<sub>臣</sub>薩敏

主事<sub>臣</sub>呂雲棟覆勘

欽定四庫全書

北海集卷二十八

宋 綦崇禮 撰

劄子

乞申飭百官劄子

紹興二年閏  
四月十三日

臣伏觀周宣王之小雅於車攻則曰內修政事外攘夷狄復文武之境土於吉日則曰能慎微接下無不自盡以奉其上然則中興之効本於修政事而政事之修亦在夫小大之臣無不自盡而已今朝廷播遷庶事草創

外備疆敵內鋤羣盜日不暇給而百司庶府小大之臣類多苟且偷安不務舉職姑息胥吏濶畧細務累資養譽猶襲承平之弊其間亦有孜孜奉公疚心職事則眾必非笑指以為迂至摘其事而靳之曰了得其事便足以勝夷狄否臣切怪之且國家大體輔弼大臣任之所謂百司庶府之臣知治其一官一職而已夫使一官一職而皆治焉則事將無所不治傳曰嫫不恤其緯而憂宗周之隕為將及焉彼憂之誠是也蓋亦圖其所憂而

効於上歟儻無所陳其智謀以裨國論之萬一乃徒私  
憂過計空廢實務亦奚救於危亂哉今不及其暇時修  
起庶政顧以細務為不足省則大事亦將委靡而紀綱  
弛矣紀綱既弛而欲駕馭豪傑以興衰撥亂不亦難乎  
臣愚欲望聖斷深察茲弊申飭百執事之臣各揚其職  
無以空言憂國而妨實務庶幾細大畢舉紀律設張則  
內治外攘無所不可矣取進止

面對第一劄子

臣觀近者金人議和託言劉豫所請雖敵情叵信然而中原殘破民力困瘁不堪驅役豫麟父子特倚金人為重以拒王師如聞敵自有故且倦于南牧則議出于豫欲款吾問罪之舉延旦夕之命理亦或然今敵人遣使先至豫所乃來而所持書輒有封疆之畫其為豫計無疑陛下灼見其情報書曲折事理詳盡固應奪其狡謀破其姦膽不復敢肆桀驁庶能聽順以定和約然而猶可慮者萬一負恃彊敵尚懷逆圖必欲窺吾境土或恐

稽留使人呼敵騎以來邀脅則吾可以不為之備乎今  
已過防秋且遠近傳聞通使人情恐便舒緩臣愚欲望  
聖慈申戒松江將帥明遠斥候防扼險要選練士卒日  
討于師常如遇敵以為先事之備庶無後悔苟和議遂  
成亦未可以弛備况今日耶臣過計如此惟陛下裁擇  
取進止

面對第二劄子

臣伏觀陛下懲彊敵之侵凌念兩宮之阻遠不憚卑詞

以通使屈已以議和上以為宗廟社稷靈長之計下以  
息海內元元戰伐之苦至誠交感異類草心甚盛德也  
然以臣愚私竊度之如陛下神聖之資英武之畧內有  
撥亂之志而乃鬱鬱居此忍自卑屈以求成請好豈得  
已哉徒以事勢未競國步未夷生民未安故為計出此  
庶幾天誘其衷還我二聖休兵蓄力徐為後圖非謂舊  
事可忘中國可棄敵情可信能恃以久安也然則約和  
之後便欲高枕而卧得乎仰惟聖志固將大有所為興



起庶政觀時俟釁期復舊業不唯苟紓目前之急而已  
臣願陛下堅坐薪嘗膽之志勵宵衣旰食之勤深詔大  
臣簡賢能慎名器明殿最嚴賞罰申飭百執事之列下  
至州縣之吏各修厥官毋敢媮墮革因循之弊去苟且  
之習要使人人公心為國誠意在民而無養資尸祿計  
日待遷之患則衆治舉矣於是生財積穀繕甲治兵畜  
用度寬賦歛以實民力汰冗弱精選練以作士氣日伸  
月長假以歲年一旦起而用之則大計可圖成功可必

也顧惟今日權宜之議所利在此昔周宣復古蓋以內  
修政事外攘夷狄越之報吳亦曰十年生聚十年教訓  
茲非往事之明驗而陛下之所熟聞者乎伏望陛下不  
以臣言為腐儒常談留神而勉勉焉天下幸甚取進止

面對劄子

臣聞為天下者審夫議論規模所存而已規模者國家  
所治以立議論者規模所待而定議論定則規模立而  
國家之勢成矣議論不定則規模不立而國家之勢危

矣夫規模議論尤急於天下多事之際議論定則成不  
定則敗規模立則存不立則亡此成敗存亡之機也仰  
惟陛下初紹大統適當戎狄擄噬盜賊憑陵之時凡所  
為議論規模有未能定今八年之久天下之變至此已  
極戎狄之要雖未可得而其情已見盜賊之暴雖未盡  
平而其勢已蹙事固有失之於終其在今日收終之時  
也故臣愚竊以為今日之議論規模宜不出三者恢復  
中原以成再造之功上也因所有之地而疆理之中也

苟目前之安而無所為下也語其上則今之力誠未可  
為守其下則吾之勢不可復立惟度時量力就其中者  
為之中者既成則其上可馴而致苟止於下則雖志於  
中者有不可得矣臣愚欲望陛下發自聖志明詔大臣  
無取高言以害實治毋偷苟安以玩歲月議論審其可  
用規模定其適中以此立政事以此任人材以此責功  
效如是而期月之間治功不成未之見也

面對劄子

臣聞君之有臣所以濟治臣効其實用則君享其功臣竊其虛名則君受其弊實用之利在國虛名之美在身志於國者不計一己之毀譽而惟天下治亂之憂潔其身者不顧天下之治亂而惟一己毀譽是恤然而効力於國其實甚難而世未必貴竊名於己其為則易而且以得譽二者之用捨繫風俗闢治亂有天下者不可不察也昔西京之士惟其徇國而不求名故漢道以昌司馬氏之臣務為浮虛而無實用故晉室以亡前世之鑒

其可忽諸臣竊觀今日士夫之俗而知國家之不競蓋在於此無激昂奮勵之志而以循謹自持為賢無捐軀致命之節而以全身遠害為智方聖哲馳騫惟日不足之時則知無不為者所宜貴也而見謂生事當黎元凋瘵勞來還定之日則服勤州縣者在所尚也而取譏俗吏以至避言利之名而常賦經用寢以不理要解事之目而舊章故實多所廢格若此之類皆便已自為非國家之福豈陛下所利哉臣愚伏望聖明深燭厥理凡官

人賞罰之際取其能濟時用有益于國家者進之察其  
虛名無實欺衆要譽者退之黜陟既明好惡既彰則人  
材風俗從而丕變而真賢實能出為陛下用矣取進止

乞討論納節換官劄子

臣竊見近者楊惟忠邢煥皆以節度使致任即不曾鑠  
院降麻伏緣節度使除拜移改若恩加之類並須宣制  
豈有見帶節鉞致仕而不然此一時之闕典也臣嘗記  
祖宗時凡節將臣僚得謝不以文武並納節別除一官

致仕如仁宗朝張耆自使宰授太子太師楊崇勳授太子太保致事皆武臣也惟熙寧間富弼以元勳舊相始令持帶節鉞致仕弼猶力辭不敢當者久之其後相繼者則曾公亮文彥博也他人豈可援以為例也近歲以來致仕者不問何人不復納節換官亦恐有違舊制臣愚欲望聖慈特降睿旨并令三省樞密院討論舊典施行

遵用舊法劄子



臣伏見自渡江以來官司案籍例皆不存而吏部所掌官簿尤難稽考故遂急申明以為約束其目非一士大夫到部凡磨勘注擬賞功任子之類皆粗有條理其後亦稍稍尋訪舊法在部見今遵用然風俗之薄久矣吏部隨事申明有所從寬以便人情士既習見其事則雖有舊法而於已不便者則必羣譟衆起干訴百端必欲有司申明以破舊法如是者多矣臣竊思之士農工商之四者皆陛下之民也亂離以來士之失職者固可憫

矣聖訓孜孜未嘗不以是為言而今之在官者亦所同恤而無異詞也獨不念今三農之務與百工之肆商旅往來之塗亦能無失其業而官之為法曾少優於承平時否然則吏部所以待天下之士恐不可以廢舊法而專徇一時之人情也臣愚欲望聖慈特降睿旨應吏部自渡江以來凡所申明與法相戾者並從舊法其因去失案籍措置指揮令逐一類聚看詳若舊法已有該載不妨遵用者取旨別行刊定仍降指揮應吏部條目已

有舊法者今後不許申明權宜改易庶幾士安分守而有司不至廢法亦中興之政所先務也取進止

乞召臣僚降詔劄子

臣聞君使臣以禮臣事君以忠君之視臣如手足則臣事君如腹心施報之道在古如此方今國步艱難需人共濟正陛下任賢使能以圖中興之時收用人材誠急先務然號召之際或不能致欽盡禮以待之所謂真賢實能將卷懷而去彼屑就者非誘於利祿則逼以威刑

欲其盡忠以為腹心之用不可得也臣伏見祖宗舊制凡在外除授內任及被召臣寮若學士以上職任及新舊宰執必降詔書以為赴闕之信至其下則或尚書省給劄吏部給符以聖旨行下照會催促而已所以別等威示眷禮於貴近之臣也自兵興以來急於除用降詔之禮一切盡廢乃或有如敢遷延當重寘典憲之令矣茲豈所以待賢能之道哉臣愚欲望聖慈舉行故事凡六尚書及翰林端明殿學士以上職任并新任與曾任

宰相執政官若自外除授或被召應赴行在者並令尚書省日下報學士院頒降詔書以示待遇之禮且使外任近臣有所取信以離其官守仰稱陛下任賢使能之意取進止

李邴分門內外制集劄子

臣伏見前叅知政事李邴任翰林學士日將本院內制文字分門編錄已成部帙甚為詳盡自渡江之後本院文籍散失無復存者緣內制文字體製不一而祖宗以

來述作今悉無所見稽求檢閱實為急關契勘本官見以  
端明殿學士領宮觀寄居泉州臣愚欲望聖慈特降睿  
旨下泉州差書寫人官給紙劄就本官家傳錄一本繕  
寫裝背如法仍委官一員點檢對讀務令精詳共限一  
月了畢差人賫赴行在于學士院送納庶使本使撰述  
文字有以考據取進止

論保奏功賞劄子

臣竊見近時諸處保奏功賞多有白身人乞補文資或

與免解免省試特赴殿試之類其間未必皆是士人不  
無冒濫方今吏選員多闕少擬注不給若更開此塗則  
愈見猥冗臣愚欲望聖慈特降睿旨今後白身人應緣  
功賞補官止許補班行名目其未應補品官者依效用  
入資法收補即不得陳乞補授文資及免解免省試若  
特赴殿試之類庶革冒濫之弊稍清士風取進止

修神宗哲宗兩朝實錄劃一申請劄子

南渡後  
初史館

申  
請

准紹興四年五月五日尚書省劄子五月四日

三省同奉聖旨神宗哲宗皇帝兩朝正史實錄

並令史官看詳重修所有應干合行事件條具

以聞右劄付修國史日歷所令先次條具下項

一本所恭奉聖旨看詳重修神宗皇帝哲宗皇帝正史

實錄欲乞將神宗皇帝實錄先次看詳重修

一合要照修文字乞就秘閣檢借抄錄如闕許於行在

臣寮士庶之家借本傳錄用畢給還如在外州軍臣寮



士庶之家令所在州軍官給紙札借本抄錄發赴本所  
一今來先次重修神宗皇帝實錄欲將秘閣抄錄到朱  
墨本及後來降到墨本實錄一處看詳重修進呈

一應行移取會及約束日限斷罪並令本所依已得指  
揮施行

一合用紙札朱墨錢物等欲就本所應副支使

一今來本所現闕投下申奏文字人欲乞依勅局例從  
本所指名下三省大程將差大程官四人與免本處諸

般重難差遣

又再申請劃一劄子

一本所恭奉聖旨看詳重修神宗皇帝哲宗皇帝正史實錄欲乞將神宗皇帝實錄看詳重修所有哲宗皇帝實錄合要當時臣寮家傳行狀墓誌等文字亦欲乞從本所先次移文行在臣寮之家及下諸路委轉運司尋訪子孫抄錄編類成冊發赴本所

一本所官係先差修纂建炎日歷員數不多今來重修

兩朝正史實錄欲乞詳酌添差官三兩員協力同修

一契勘祖宗朝日歷實錄正史並於史館編修元豐官制分日歷屬祕書省著作局實錄正史各別置院近緣修纂日歷為著作闕官令長貳通修又差郎官兼領緣上件職事止係修纂日歷即與史館不同今來既令本所官重修兩朝正史實錄欲乞將祕書監少帶兼直史館著作郎佐並帶兼史館檢討其郎官現兼著作郎者亦改兼史館職事庶於名實不致差紊

又再申請劃一劄子

一契勘本所及秘書省並闕神宗哲宗兩朝正史欲乞  
申明朝廷行下諸路州軍於臣寮之家廣行搜訪

一契勘神宗皇帝實錄自有舊來朱墨本其墨本係元  
祐年所修已是成書其朱本係紹聖年間因蔡卞起請  
重修將舊書所載多所增損務要傳會一時紹述議論  
而元祐史官其間語言不無過當失實然亦有別行引  
用照據以證墨本未盡去處若將二本參照修定委是

詳備欲乞從本所官先據朱墨本看詳重修如或尚有合行取會照對文字逐旋申明取索施行

一契勘哲宗皇帝實錄係崇寧以後蔡京提舉編修叙事之外多是增飾語言變移是非殆非實錄之體成書之後其當時時政記等應干文字又皆焚棄竊恐所載不無更改隱漏失實即難以便據舊錄重行修定欲乞從本所逐旋申明於諸路州軍及舊臣之家更行取索求訪當時文字事跡按據叅照看詳重修庶無牴牾

薦察官劄子

臣等今月二十二日奉御筆付臣某令與沈與求同薦數人有素行不阿附者具名進入以備察官之選臣等恭稟聖訓同共商量以平日所得於公論者五人應選具列於後

左朝奉郎尚書祠部員外郎鄭作肅性稟純潔有學術通於世務剛介寡合議論有餘

左朝奉大夫行太常博士趙霽性行純靖有操守更歷中外差遣皆有可稱

左奉議郎權知柳州常同元祐言官安民之子安民首  
擊蔡京者與陳瓘鄒浩龔夬等齊名而其子孫如同學  
識操履最有家法

左宣義郎通判漳州李長民有文采學問嘗中詞科議  
論疏通清介有守

左從政郎前太學博士程克俊有器識議論精審所守  
堅正而不為徼許

前件官皆有特名素行無缺察其平日必不肯為阿附

以臣等愚見可以仰備采擇伏望聖慈更賜詳酌取進  
止

除兩浙東路安撫使上殿陳乞劄子

契勘浙東一路管下州縣憑依山谷邊臨江海皆係控  
扼唯藉有心力可以仗兵將捕盜官在任乘無事之際  
協力措置以備緩急臣今誤蒙恩付以帥事竊慮本路  
州縣兵將捕盜官內有老病及懦弱臨事不可倚仗之  
人伏望朝廷特降指揮許臣體量具名申尚書省或樞



密院取旨放離本任別令合入差遣其闕從臣一面踏  
逐奏辟差填一次庶幾得人緩急可以使喚取進止

上尚書省乞換閑曹劄子

某見領左選職事繁劇兼掌內制亦係獨員又蒙差權  
尚書兩選事緣某久病右臂手指攣痺疼痛執筆有  
妨深懼簽押文字不前因致曠闕伏見元祐間陸佃以  
兼史職辭吏部換禮部侍郎崇寧初張商英亦以修書  
自吏部改刑部今來兵部侍郎程瑀已得旨與郡某欲

乞比附前例換上件闕庶得職事稍閒可以專意應副  
學士院文制衰病之軀免致顛仆候鈞旨

又上尚書省劄子

建炎四年九月三日尚書省劄子恭某劄子伏覩近降  
指揮令講讀官翰林學士後省官日具故事一兩件供  
進者契勘往時供進故事本係講筵之職欲乞指揮下  
講筵司置歷定日輪官供進施行伏候指揮

欽定四庫全書

北海集卷二十九

宋 綦崇禮 撰

奏狀

辭免起居郎奏狀

建炎三年四月二十  
六日工部員外郎上

臣四月二十六日准尚書省劄子奉聖旨除臣起居郎  
日下供職者聞命震驚撫躬罔措竊以左右置史起居  
是司入奉嚴宸記事言於螭陛出陪清蹕隨伏衛于鑾  
輿密邇從班最為妙選必得通今博古守官而不撓乃

能執蘭載筆書法而可觀如臣者識類棗昏材同樗散  
學汙而近詎當良臣之評性蠢而疎難處侍臣之列願  
回睿照追寢誤恩俾更選於時髦庶克諧於議論臣無  
任祈天俟命之至謹錄奏聞伏候勅旨

辭免召試中書舍人奏狀

建炎三年七月二十四日起居郎權給事

中上

宣教郎試起居郎兼權給事中蔡崇禮奏今月二十四  
日准尚書省劄子奉聖旨召試中書舍人者聞命震驚

撫躬自失伏念臣頃罹憂患重歷艱危心術耗昏學殖  
荒落濡毫史策已慚記事之能給札詞闡寧識代言之  
體忽膺嚴召深忤危衷願追寢于誤恩庶少安于愚分  
謹錄奏聞伏候勅旨

辭免中書舍人奏狀

臣七月二十九日准尚書省劄子奉聖旨除臣中書舍  
人日下供職及與轉通直郎者升華法從通籍朝闈省  
踰分以難安敢陳誠而有請臣以冒居左史尚補西垣

偶此缺官例從給札素乏湧泉之思幾成閣筆之羞雖  
趣以終篇初不識鳳閣文辭之樣苟責其視草將曷裨  
淮南書詔之工反復自惟周章失措願收還于成命庶  
弭息于煩言謹錄奏聞伏候勅旨

辭免兼史館修撰奏狀

臣伏准勅命差臣兼史館修撰者臣竊見陛下躬上聖  
之資建中興之業經營圖治七年于茲撥亂反正功德  
甚大而史家之歷闕而不書非帝王所以垂訓之意乃

因有司之請設局命官付以茲事惟擇所逮蓋將課其  
編纂之功而程其述作之能不徒苟以一職榮之而已  
如臣固陋有素加以病昏聰明不及於前學術寔忘其  
舊久塵法從無補皇猷蓋嘗三貢封章祈解近職恩私  
隆厚未忍棄捐黽勉備官進退惟谷今以衰殘之質使  
其搗文詞禁勸學經帷常懼弗給而况一代筆削之重  
敢復冒昧貪榮而兼斯乎伏望聖慈察其不逮追寢誤  
恩別選作者庶協公議所有勅命臣未敢祇受謹錄奏

聞伏候勅旨

辭免翰林學士奏狀

聞命震驚罔知所措臣以荒疎不腆之學綴緝不工之  
文自忝從臣每兼內制暨再還於班列蓋五被於選掄  
歲月空移功能何有過錄攝承之效甫陞寓目之員偶  
入對於清光乃近叨於眷獎占學士久虛之次遂俾為  
真預明君親擢之榮豈勝其任周旋自視進退靡遑伏  
望聖慈俯矜危懇第姑容於代匱亦奚遽於超遷特狀



睿命之行庶息煩言之誚干冒天威臣無任踧踖俟命  
之至謹錄奏聞伏候勅旨

辭免兼侍讀奏狀

聞命兢惶罔知所措恭惟陛下以日新之學輔天縱之  
資推大法於春秋深得聖君之興越諸儒於今古獨明  
王道之歸雖專門之師莫望於清光在歷世之君孰偕  
於盛美而臣蚤因覓舉粗亦知書顧倫類之不通且見  
聞之非博蓋嘗涉獵三家之記竊玩其文辭奚暇研窮

一字之微以言其褒貶仰神心之自得慚惜學之何施  
藉令裒衆說於訓詁之間安得措一詞於睿明之下况  
臣心思衰耗目病昏眊已知視草之難能詎可執經而  
入侍願回成命更選鴻儒使無妨進之譏庶獲異聞之  
益披誠良確得請是期所有誤恩乞賜寢罷謹錄奏聞  
伏候勅旨

待罪奏狀

七月十一日

臣今月十日學士院准尚書劄子臣寮上言臣所草吳

玠麻制有曰陸海神臯既失秦川之利銅梁劔閣敢言  
蜀道之難以秦川字有疑及不識敢言之義何謂乞改  
正行下奉聖旨令學士貼改臣已遵依聖旨貼改訖緣  
臣識慮不明語言失當因臣寮所論始見其非不職之  
辜其何可逭臣見在病假居家待罪伏望聖慈特賜黜  
責施行謹錄奏聞伏候勅旨七月十二日三省同奉聖  
旨放

乞宮觀奏狀

臣輒瀝危懇上瀆天聽臣一介孤生遭遇明聖服在侍  
從首尾七年昨緣病衰屢求閒外恩私未慙獲昇近藩  
到官五旬即聞海道之警淮甸倣擾遠近戒嚴戎輅親  
征六師既發淊東心腹之地形勢頓孤臣職在撫綏實  
分憂寄雖隨事加備力豈足支仰賴陛下神武英決伐  
謀制勝將士用命賊計遂窮臣既恃而不恐因一切安  
之以無事洎敵衆遠適法駕凱還一路軍民訖皆安堵  
向非王師卻敵江上用克無虞臣之么麼其將何以塞

責方朝廷儆戒為盛秋捍禦之防將相協同圖中原恢  
復之策小大臣子咸思自効而臣抱疾寢久老境日侵  
臂痛指攣胃滿氣急目視昏近怯理簿書精力疲乏難  
周職務重以陛辭之日訓戒丁寧事無鉅細皆躬親省  
閱不敢委之僚屬以偷安自瑕姑欲彊勉夙夜圖報毫  
分而其憊如此一有曠弛寧不上誤陛下使令之意伏  
望聖慈察臣情悃實懷此憂非敢無名辭難避事特降  
睿旨除臣一在外宮觀差遣任便居住使得專意醫藥

以養殘年改命能臣付之方面庶幾公私義分兩得其  
宜儻沉痾之有瘳豈捐軀之無日臣不勝俯伏俟罪激  
切拳拳之至

再乞宮觀奏狀

臣近曾具奏以抱疾寢久恐妨職事乞除一在外宮觀  
差遣伏奉詔書不允臣仰體睿訓不敢繼有瀆聞今者  
勉治所職又歷五旬而臣比因久雨冒陰濕之氣臂疾  
屢作難於書字又以體嘗伏暑遇熱增甚心思昏憤動

多健忘若尚冒居劇郡深恐自取顛沛上孤陛下天地  
父母始終保全之大德夙夜愧懼不敢違安臣契勘本  
府近日催科應辦等事如和買本錢借撥軍糧及和糴  
米皆已數足收趣箭鏃翎毛按月無違分造十三車戰  
船熟材亦已起發其餘逐一次第推行別無規避直緣  
衰殘力不任事須至再有陳請伏望聖慈察臣悃悞特  
降睿旨檢會前奏除臣一在外宮觀差遣任便居住庶  
就休閒以便醫藥冒犯天威不勝俟命之至謹錄奏聞

伏候勅旨

乞再任宮觀奏狀二道

臣以所領江州太平觀任滿自陳准勅令再任今年六月滿三十箇月罷伏念臣久從閒冗愈逼衰殘既自力而不能尚為貧而有請揆再三之瀆宜即嚴誅希萬一之恩更投大度伏望聖慈曲矜舊物特降睿旨許臣候今任滿日更令再任一次冒犯天威臣無任隕越俟命之至



臣昨知紹興府充兩浙東路安撫使緣臣多病自陳蒙  
恩差提舉江州太平觀任便居住合至今年十二月滿  
三十箇月罷伏念臣頃繇遭際過竊高華名在禁嚴任  
更方面雖不能而當止顧大德之未酌坐視時難敢圖  
自逸但犬馬寢衰之齒疾疹屢侵况妻孥不給之資姻  
嫁仍迫既無壯事猶利閒官輒忍愧於心顏重投誠於  
君父尚撫舊物曲軫至仁儻遲暮之秋復堪於煩使則  
糜捐之節終効於初期臣欲候今任滿日再乞宮觀一

次干冒宸梳臣無任跼蹐俟命之至

天寧節謝賜御筵奏狀

誕日屆期啟靈科於真館需雲錫燕將厚意於中宸福  
集上躬恩均近輔竊以道興乎世聖有所生紀英帝之  
神靈益表生成之異詠周王之壽考式昭歷數之長異  
世同符於斯為盛屬千秋之令節同萬國之歡心而臣  
等位咸列於巖廊報宜先於寰宇恭惟秘範祇造殊庭  
方輸歸美之誠俄拜示慈之渥肆筵陪鼎益彰眷遇之

榮加算授圖更行靈長之慶此蓋伏遇皇帝陛下天親  
一德帝與萬齡日月並明仰照臨而不見乾坤比大荷  
覆載於無窮俯嘉葵藿之私特厚鼓鐘之響歌鹿鳴而  
三拜既盡忠臣之心賦天保之六章願祝聖人之壽

舉仇愈充監司奏狀

建炎四年二月二十一日中書舍人上

准尚書省劄子奉聖旨行在從官各舉可充監司者右  
臣伏覩起復朝散郎新差知建昌軍仇愈性資忠厚趣  
操端方進士登科富於學術歷任縣道皆有治迹律身

無過疾惡如讎其為政以舉法循理為務抑豪右伸寒  
弱不撓於彊禦不詘於勢利所至而人思愛之使其當  
一道之寄必能激濁揚清除民疾苦如言者之論今保  
堪充監司任使如蒙朝廷擢用後有不如所舉臣甘當  
同罪謹錄奏聞伏候勅旨

舉賀允中落致仕奏狀

學士院同吏部  
侍郎陳與義上

右臣等伏見左朝奉郎尚書戶部員外郎致仕賀允中  
儒學決科曾歷學官禮寺館職郎曹自靖康元年因疾

病致仕今已痊安其人年齒方彊學問不廢練習世故  
議論可取臣等保舉堪令再仕伏望聖慈更賜采察特  
降睿旨施行謹錄奏聞伏候勅旨

代李邴辭免翰林學士奏狀

聞命震驚撫躬蹶蹈伏念臣頃由簡拔嘗直禁嚴典文  
章翰墨之司粗陳薄技輸獻納論思之益莫見微勞遽  
抵譴訶久從流落志慮耗於積憂之後筋骸疲於多病  
之餘清故里之煙塵覲獲耦耕於南畝瞻中天之日月

敢期重入於修門矧今國步尚艱民情未輯軍書狎至  
正賴於謀謨王命時行尤資於辭令兼任斯責實惟此  
官籌幄居中將以收仁聲之助詔音布外必能感武夫  
之心要須任才乃可稱職如臣已試惟衆所知顧有未  
補於平時况可冒居於今日仰祈睿斷追寢誤恩俾更  
就於閒官庶無妨於賢路臣無任祈天俟命激切屏營  
之至謹錄奏聞伏候勅旨

代宰執謝賜喜雪御筵奏狀

上天同雲載格豐穰之兆君子有酒肆均宴衍之歡慶  
逮農夫澤先近輔恭惟皇上陛下道御六氣仁撫萬方  
有感必通獨運精神之妙無遠弗屆自臻天地之和日  
雨曰暘而五穀登為酒為醴而百禮洽方嚴冬之在候  
宜嘉雪之應期喜瞻盈尺呈瑞之符特厚折俎示慈之  
錫加籩樂作邁周室之吹笙擊壤聲連陋楚辭之儷曲  
臣等幸逢熙洽莫贊燮調伏飲君恩遂歌九行之節下  
詢里俗更觀三日之祥

固守利害奏狀

伏審張浚一軍士卒最為簡練器甲最為整飭猶可毆而  
用之韓世忠驍勇無前蓋嘗抗敵於江上今復屢勝羣  
盜度其果敢亦必不肯辭難其下如岳飛皆可賴以為  
助第不知士卒果能齊力一心無所畏避以當金人之  
鋒否舍是三將則其餘無足倚者

申尚書省狀

准尚書省劄子云云者某依稟指揮伏見中原未平四



郊多壘主憂臣辱正羣下効命之秋某雖庸懦不習軍  
旅之事若令自詭請行則不可謂能萬一朝廷誤有驅  
使則力所堪者唯所東西不敢辭難以避事君謹具狀  
申尚書省伏乞照會



欽定四庫全書

北海集卷三十

宋 綦崇禮 撰

啓

及第謝鄉郡守倅啓

逐隊而趨愧匪處囊之穎綴行以出亦陪入彀之英仰  
被恩榮伏深戰懼惟聖世之先務以得人爲最難素養  
弗加成材斯寡委榷楠而莫植孰觀在止之菁菁捨駮  
驥而不閑詎覩食場之皎皎道有升降時因盛衰泮水

不歌子衿是作遂使成周之里選流爲近世之科名天  
佑斯文運開列考本六經而造士建三舍以成能訓迪  
一新盡黜雕虫之陋指歸有在誰誇繡悅之工淵源既  
純器質咸美顧今日廟堂之老皆當時庠序之才迨嗣  
聖之膺圖伏先猷而燕翼丕崇子構有隆不拔之基恢  
廣文聲增耀無前之蹟干戈載戢禮樂並興爰更取士  
之科大闡育材之地掃千年之弊習追三代之宏規簡  
秀彥於一鄉采芹在泮收英豪于萬國振鷺飛雝神化

誕乎士風丕變者韶胥勸弦誦相聞賢闕來鼓篋之游  
農野無帶經之苦雲漢每瞻於聖作範模兼得於師儒  
五尺之童羞道威文之事一介之賤願歸堯舜之朝既  
由學以化民可因言而頌行文皆爾雅孰非體要之辭  
仕必慕君自許功名之會翹翹競秀藹藹爭馳仰繫樂  
育之風克底美成之效屬三年之大比率多士以同升  
賓興已盡於賢能辯論更先於俊造雖人人抱玉未免  
於遺珍而一一吹竽豈容於濫奏願此譽髦之選宜登

傑異之材如某者學術不優性質甚下徒守箕裘之業  
僅聞詩禮之言幸遘昌期久濡善教三充方貢兩冠賢  
書倦翼何堪望絕一飛之便曲材無取誰爲萬乘之容  
方躡屩以觀光遂操觚而試藝中非爾力命豈人爲偶  
叨蘭省之奏篇獲與楓宸之賜策宸章深灑邁典誥之  
遺文聖問淵微究天人之妙蘊豈彼腐儒之論可當睿  
鑒之求顯黜是虞明揚忽逮筮鴛鷺而並進羅鳧鷖以前  
趨交戟森森恍再游於帝所粹容穆穆驚並近於天光

傳丹陛以宣恩曳青綸而拜命名聯帝子共誇金榜之  
榮喜動親顏更樂萱堂之慶布韋歆豔閭巷咨嗟夫何  
千載之逢有此一時之幸靜言僥冒厥有夤緣此蓋伏  
遇某官黼黻帝庭甄陶士類不屑之教曲盡於平時有  
味之言陰爲於道地俯憐衰躓力賜提攜會因鄉黨之  
同推更與郡侯而勸駕遂容蹇步亦陟亨途某謹當恪  
守士規寢嫻吏道幸保一經之遺子更希三釜之及親  
學於田野之間粗知爲政服在縉紳之後敢怠修身

勉効古人用酬知已

上中書張侍郎啓

總

某聞不願萬戶侯欲識荊州之重徒見二千石莫如逢  
掖之賢事有相須理宜共濟豈獨風流之慕實惟聲氣  
之求故下之資上也若絲蘿之附長松必因高而借勢  
而上之與下也如鳳凰之將衆羽必引類而逢辰泛觀  
昔人盡由此道書勤三上情可見于退之善取一言賢  
愈稱於叔向敢陳固陋上瀆高明恭惟某官嶽降炳靈



天鍾間氣僊風道骨高丹臺紫府之名瞻智宏材偉清  
廟明堂之具映儒林而絕類邃經術以無雙射策妙齡  
早入英雄之彀著鞭夷路徑躋侍從之班更掖垣學省  
之遊歷崇伯禁林之選論思獻納謀猷深契於一人號  
令文章制作遠追於三代益藹具瞻之望亟庸注意之  
求乘太平熙盛之隆參庶務幾微之重振中臺之綱轄  
化源已賴於澄清秉兩省之樞衡政本更資於密勿獨  
當鳳詔茂對龍光恪恭加小物之勤慎重得大臣之體

蕭瑀任職曾無一尺之違元超在中豈藉多人之助內  
彌綸於百度外鎮撫於四夷陳繼述之源力守熙豐之  
政致威懷之畧盡收燕薊之封明良咸慶於千齡文軌  
永同於四海允賴忠嘉之策克成俊偉之功方帝念於  
元勲屬位虛於次輔考慎其相登庸將在於真儒訓迪  
厥官師表莫先於鉅德佇聞顯冊下慰輿情富貴難能  
黑髮遂登於鼎鉉恩榮可羨彩衣長奉於庭闈惟福祿  
之甚崇保謙冲而克荷不掩絲毫之善務收尺寸之長

安國推賢悉舉知名之士當時好客陰加有味之言期博盡於人材用增光於相業高風所暨多士同歸伏念某天與蠢冥地資寒素愚耽古道罔通世務之宜學守陳言未覩聖經之奧早襲箕裘之業久從庠序之遊踰踰十年淹留累上壯志潛消於螢雪亨期望絕於風雲三釜何爲覲有及親之喜一經孰授難忘遺子之勤猥幸奏篇叨榮賜第洎待年於太學嘗分隸於西廡接武英躔謂中師儒之選失身銓調乃沉俗吏之卑一佐縣

章四更歲籥困裝懷之牒訴走撲面之埃塵拄笏西山  
何知官事扶犁南畝思老故園將投幘以言歸會及瓜  
而更代念良時之難得喜正路之方開藹藹而多吉人  
雖不乏羣材之用斷斷而無他技猶能占一藝之長強  
整塵冠言趨金闕望平津之館益廣招延登元禮之門  
竊深欣慕載叙歸棲之願冀回教載之私伏望某官廓  
宏度以兼容收衆能而並蓄靡間匹夫之賤許窺數仞  
之巖拭銛豔於華陰爲加淬礪借扶搖於窮髮俾託吹

噓庶終此身不爲棄物若山若水儻過於知音守道守  
官誓圖於報効

上尚書李左丞啓

兩字  
漢老

伏念墻仞彌高曼絕潭潭之府階躔在列還瞻兩兩之  
星眷茲絳帳之諸生實忝青氍之舊物望翹材之深峻  
曳裾曾見於當年撫駕駕以疲勞驤首猶知於故道久  
歎泥塗之辱豈忘德宇之歸恭惟某官名世上賢濟時  
遠畧學該理貫窮天人精禋之原德粹量夷蘊山河深

厚之氣挺儒林而獨秀鼓文陣以無前發策決科起冠  
英雄之毅簪毫持橐偏宜侍從之班推論思獻納之勤  
歷翰墨文章之選訐謨帝載潤色皇猷注上意以彌深  
係輿情而久屬遂登庸於丞弼以參秉於鈞衡當熙洽  
之千齡萃幾微之萬務振維綱于管轄獨高曹魏之風  
奉賡載於巖廊叶濟臯夔之美文教誕敷於華夏武威  
遠暢於蠻夷維政事之交修肆邊疆之廣闢舉燕雲之  
境盡歸輿地之圖掃邊漠之區悉變衣冠之俗綿烟火

於萬里同車書於一家亶繫廟勝之謀坐致時雍之化  
仰忠勞之顯著宜寵任之專崇况天監有周世克生於  
山甫而帝賚良弼夢夙兆於高宗適茲宰席之虛行見  
制麻之出履姬公之赤舄進憑鼎鉉之安戲萊子之斑  
衣退奉庭闈之養兼忠孝功名之兩得極古今臣子之  
至榮方將舉幽隱而振滯淹程功能而明黜陟躬吐握  
以來寒畯之士走旌車以蒐尤異之材共圖又於王家  
用光明於相業好賢有素善頌匪私某頃以孤生言趨

上國春闈較藝誤甄采於文衡辟水育材叨選掄於師  
鑒識駿蔑於堂下得孟嘉於坐中驟蒙國士之知躡置  
衆人之右覽文詞之小技借以揚稱指庠序之清聯許  
將提掖靡因介紹直出遭逢靜惟特達之風竊厲激昂  
之氣顧蠅翼莫陪於驥尾而鷗飛難望於鵬搏命與時  
乖願將事阻遽隨選牒輕去師門甘沉下邑之勞分絕  
華途之望一從吏役四易歲陰紛牒訴以裝懷積簿書  
而眩目紅塵董楚憂或未辭黃卷聖賢邈無復對蹉跎



末路辜負初心唯貪冒於斗升敢進圖於尺寸尚幸當  
路上官之假借謂更賢人君子之器題委幕府之文書  
領泮宮之衿佩禮教每殊於俗吏吹噓迭奉於褒章得  
稍進於階資乃復從於銓調念方急逮親之祿曾莫知  
竊食之期孤舟絕維信中流之漂激層崖失足仰行路  
以號呼追曩遇於前時卜新恩於今日燕賀欣成於大  
厦犬離還望於朱門豈無他人誰將引手伸於知己是  
用傾心輒干黃閣之嚴欲附青雲之末斂板再趨於熒

座摳衣如在於鱣堂問勞勤勤俯記沉淪之迹矜憐惻  
惻曲形教載之私體恩意之未忘作懦衷而思奮冶金  
無躍姑聽命於鑪錘匠木有宜終成材於斤斧更陳尺  
紙重叙寸誠伏望某官廓大雅以兼容收衆長而並用  
雖文儒之選非寒陋之故居而學校之遊亦妄庸之已  
試願力鞭於蹇步俾追躡於英躔克終平昔之言盡出  
生成之賜麀頭鼠目奚妄意以求官狗盜鷄鳴亦有時  
而報効

賀呂忠穆公著左相啓

播告大廷還登上宰峻班儀於左棘首揆路於中臺四  
夷聳聞九鼎增重伏惟某官賢推名世道富經邦嶽降  
神而生申實維周翰帝賚弼而得說用作商霖變故屢  
更精忠彌著掃除內難高五龍夾日之勲攘却外虞成  
一馬渡江之業方輔寧於法駕將經濟於神州貝錦遽  
興扁舟徑去屬分江而謀帥乃仗鉞以臨戎羽扇綸巾  
已坐清於妖祲命珪相印蓋疊賞於元功矧獨兼文武

之資宜並注安危之意逮聞虛位果趣賜環非衣之謗  
何傷有袞之思咸屬顧乃心王室喜魁柄之重歸而戮力  
中原佇皇家之再造天時有待物望攸同某跡滯一涯  
神馳數仞聆制麻而相慶曾無瘴海之殊引賓履以交  
趨獨嘆翹材之阻其如瞻頌可盡名言

賀張帥啓

伏審顯膺褒渥峻陟邃嚴出殿大邦盡護諸將仁風所  
被和氣已舒恭惟某官忠厚沉深直清端亮國爵綦貴

旬五遷而不矜王臣匪躬仕三已而益壯凜然勁節激  
徙頑風方騰九萬里之夷塗聊總四千石之重寄論思  
朝夕初無出處之殊宣布中和仍在循良之冠矧全雍  
之劇部乃前朝之舊都民物夥繁冠蓋聯屬惟兼控制  
於諸道何止撫綏於一方故應變則擅頗牧之威名而  
治民則有趙張之故事西京耆舊初懷借寇之私北闕  
公卿已貯舉臯之望某獲以賤士列於儒官適在總臨  
竊希教載願飾陋質御元禮於龍門將與諸生頌僖公

於泮水永言瞻抃曷罄敷陳

賀孟叅政啓

伏審清廟策勲巖廊進秩腹心所寄式酬管鑰之勤班  
級愈隆更覺陞簾之峻綸音誕告輿頌交歡竊惟慶慰  
恭以某官智蘊帝謨才鍾王佐典刑有在堂堂耆艾之  
姿悃悃無華侶侶忠純之節久叅大政深注上心入輔  
出征用兩兼於文武外攘內治身獨佩於安危屬鑿輅  
以撫師析麟符而居守委關中之重任實倚蕭何總關

下之羣司莫如伏湛迨此凱旋之慶訖無返顧之憂圻  
甸晏安宮闈寧謐既第從行之賞可忘鎮撫之勞矧帷  
幄運籌蓋並咨於長算軍師獻捷乃均賴於成謀爰陟  
崇階以旌顯伐方將乘今日可爲之會圖中原克復之  
功飭庶政以交修因衆心而進討除京都狐兔之穴奉  
九廟以還歸驅洛河戎馬之羣迎兩宮而來復遂登真  
相永乂皇家公望所歸私言匪佞某夙蒙顧予方丐退  
閑素亮其愚庶適歸田之願終知所託更深賀履之私

答檢正學士啓

比者閔勞侍從得請便安蒙換職於西清俾守藩於東  
道恩私則厚寄任匪輕夫何不敏之姿能副惟良之目  
屬有軍書之警未遑牋問之修敢謂某官高誼相先勞  
謙自牧念其初去禁庭之直情則可知察其驟臨劇郡  
之煩力當未給特加慰藉用示記存載披藻麗之工益  
覺鄙形之穢永言愧戢難盡敷陳